

Nacrt !

Na osnovu člana 28. do 30. Zakona o mjerama za unapređenje stočarstva („ Službene novine F BiH“ broj 23/98) i Zakona o veterinarstvu („Službene novine F BiH“ broj 46/00) i člana 26. Statuta općine Cazin („Službene novine općine Cazin“ broj 13/10), na prijedlog Općinskog načelnika, Općinsko vijeće općine Cazin, na _____ redovnoj sjednici održanoj dana _____2011. godine donosi:

O D L U K U O USLOVIMA DRŽANJA I GAJENJA PČELA

I - OPĆE ODREDBE

Član 1.

Ovom odlukom propisuju se uslovi za smještaj pčelinjaka, način preseljenja pčela, uslovi držanja i iskorištavanja pčela, odnosi koji proizilaze iz oprašivanja bilja pomoću pčela, zaštita pčela i pčelinjaka, te sprečavanje širenja zaraznih bolesti pčela.

Član 2.

U odluci su u upotrebi izrazi sa slijedećim značenjima:

1. pčelinje društvo (zajednica) je skupina pčela (matica, radilice i trutovi) nastanjena na saću u košnici;
2. pčelinjak je skupina košnica sa pčelama, koje su smještene na slobodnom prostoru, u posebnoj stabilnoj ili montažnoj kućici ili ugrađene na vozilo;
3. pčelar je fizičko ili pravno lice koje se bavi uzgojem pčela;
4. pčelinja paša je bilje u razdoblju cvjetanja kad ga posjećuju pčele zbog sakupljanja sirovina (nektar, medna rosa, polen i propolis);
5. pčelinji proizvodi su: med, vosak, polen, matična mliječ, propolis, pčelinji otrov, matice i rojevi pčela;

II - SMJEŠTAJ PČELINJAKA

Član 3.

Pčelar je dužan brinuti se za pčelinje društvo i pčelinjak.

Član 4.

Pčelar je dužan postaviti pčelinjak tako da pčele pri izlijetanju ne smetaju susjedima, prolaznicima, stoci i javnom saobraćaju.

Pčelinjak do 10 (deset) društava, čija su leta okrenuta prema tuđem posjedu ili javnom putu, mora biti udaljen od međe ili javnog puta najmanje 20 metara, pčelinjak sa 11-20 društava najmanje 30 metara, a preko 20 društava najmanje 50 metara.

Ako je iz bilo kojih razloga ova udaljenost manja, pčelinjak se mora zaštititi ogradom (zid, daščana ograda, gusta živica) više od 2 metra i dužom od pčelinjaka za 2-5 metara na obje strane, udaljena od košnica najviše do 10 metara.

Član 5.

Pčelinjak nije dozvoljeno smještati u blizini fabrike za proizvodnju šećera, sokova, prerade voća, vinarija, staja i đubrišta.

Proizvodni pogoni iz prethodnog stava su dužni onečišćenu ambalažu i proizvode koji su u stanju štetnom po zdravlje pčela (vrenje i sl.) držati u zatvorenim prostorima ili ih na drugi način učiniti nedostupnim za pčele.

III - SELENJE PČELA

Član 6.

Pčele se mogu seliti na pašu samo iz područja i samo u područja bez zaraznih bolesti. Prilikom selenja moraju se ispoštovati sve mjere za sprečavanje širenja zaraznih bolesti pčela i spriječiti nanošenje bilo kakve štete pčelinjacima koji se već nalaze na terenu na koji se vrši doseljavanje.

Član 7.

Za smještaj pčelinjaka na tuđem zemljištu potrebna je saglasnost vlasnika odnosno korisnika zemljišta.

Član 8.

Za doseljavanje pčelinjaka sa drugih općina potrebna je saglasnost izdata od Službe za razvoj i poduzetništvo Općine Cazin.

Pri podnošenju zahtjeva za dozvolu za doseljavanje pčelinjaka sa drugih općina potrebno je priložiti:

- potvrdu o broju košnica izdatu od udruženja pčelara općine iz koje se doseljava pčelinjak;
 - izjavu o namjeravanom vremenu doseljenja i dužini boravka;
 - prijedlog lokacije za smještaj pčelinjaka (izvod iz posjedovnog lista, skica parcele) i pismena saglasnost vlasnika ili korisnika zemljišta;
 - uvjerenje izdato od nadležnog kantonalnog veterinarskog organa da na području sa kojeg se doseljava pčelinjak nije registrovana američka trulež (kuga) pčelinjeg legla;
 - uvjerenje o zdravstvenom stanju pčela u pčelinjaku;
 - mišljenje Upravnog odbora Udruženja pčelara Općine Cazin za smještaj pčelinjaka;
- Služba za razvoj i poduzetništvo Općine Cazin ne može dati saglasnost ukoliko nisu ispunjeni svi uslovi iz stava 3. ovog člana.

Član 9.

Upravni odbor Udrženja pčelara će izdati saglasnosti za smještaj pčelinjaka vodeći računa o gustini pčelinjih društava na određenoj lokaciji, stanju pčelinje paše, zaštiti od prenosa bolesti i sl.

Udaljenost novog od postojećeg pčelinjaka zavisi od ukupnog broja pčelinjih društava i mora obezbijediti da ne bude gušća naseljenost od 10 do 12 društava po 1 km² terena.

Najmanja dozvoljena udaljenost od postojećeg pčelinjaka mora biti 800 m, a ako je vlasnik postojećeg pčelinjaka zasijao ili zasadio plantažu medonosnog bilja udaljenost mora biti 2.000 metara od plantaže.

Navedena udaljenost može biti manja ukoliko se sa tim saglasi pčelar-vlasnik postojećeg pčelinjaka.

Član 10.

Odredbe člana 8. stav 1. i 2. i člana 9. ove odluke odnose se na doseljene pčelinjake, novoformirane pčelinjake i na proširivanje postojećih pčelinjaka.

Član 11.

Pčelinjak koji bude doseljen ili formiran suprotno odredbama ove Odluke mora se ukloniti u roku od 3 (tri) dana, u protivnom biće prinudno uklonjen, a troškove će snositi pčelar – vlasnik pčelinjaka .

Član 12.

Pčelar je dužan prije seljenja pčelinjaka pribaviti potvrdu ili pasoš od nadležne veterinarske ustanove sa tačnim brojem košnica i opisom, kako bi se mogla izvršiti identifikacija.

Član 13.

Na pčelinjaku koji je doseljen mora na vidljivom mjestu biti istaknuta ploča sa podacima o broju pčelinjih društava, ime i prezime vlasnika, adresa i broj telefona.

IV - PREVOZ PČELA

Član 14.

Pčelinja društva je dozvoljeno prevoziti u svim prevoznim sredstvima koja osiguravaju zatvaranje tako da pčele ne mogu izlijetati niti se košnice mogu same otvoriti. Izuzetno kod noćnog seljenja , leta košnica mogu biti otvorena.

Član 15.

Pčelinja društva koja se sele na pašu moraju imati pratioca. Paketni rojevi i matice u kavezima ne trebaju imati pratioca.

V - USLOVI DRŽANJA I ISKORIŠTAVANJA PČELA

Član 16.

Pčelari mogu pomoću pčela organizovano oprašivati biljne kulture uz ugovorene uslove sa vlasnicima plantaža.

Član 17.

Vlasnik ili korisnik zemljišta bi trebao omogućiti pčelaru praćenje i hvatanje odbjeglog roja, ako se pri tome pričini šteta, pčelar je dužan nadoknaditi vlasniku, odnosno korisniku zemljišta. Ako odbjegli roj ne bude skinut u roku od 24 sata, smatra se da vlasnik roja nije poznat.

Član 18.

Svaki pčelar je dužan obezbijediti stalni veterinarski nadzor na svom pčelinjaku.

VI - ZAŠTITA PČELA

Član 19.

Svaki pčelar je u cilju suzbijanja zaraznih bolesti dužan odmah prijaviti Udruženju pčelara i nadležnoj veterinarskoj organizaciji ili inspekciji nadležnoj za oblast veterinarstva svaku sumnju na američku trulež (kugu) pčelinjeg legla.

Nadležni organi i Udruženja pčelara će preduzeti dalje mjere u pogledu ispitivanja uzoraka i rješenja problema, u skladu sa zakonom.

Član 20.

Vlasnik ili korisnik zemljišta koji upotrebljava sredstva za zaštitu biljaka koja su štetna za zdravlje pčela, kao i pravne osobe koje provode dezinsekciju, obavezni su o tome obavijestiti pčelare i udruženje pčelara. Obavješćavanje pčelara se obavlja putem sredstava javnog informisanja, a Udruženja pčelara pismenim putem najmanje 48 sati prije tretiranja, navodeći vrstu biljaka, područje i površinu, vrstu sredstava i vrijeme tretiranja. U slučaju odgađanja tretiranja, organizator je dužan na isti način obavijestiti pčelare i udruženja.

Fizičko lice koje vrši tretiranje na manjim površinama dužno je neposrednim kontaktom o tome obavijestiti pčelare u krugu od 3 km od mjesta tretiranja.

Član 21.

Pčelar je dužan ukloniti sve uzroke za pojavu grabeži na svom pčelinjaku radi zaštite svog i susjednih pčelinjaka.

Član 22.

Na pčelinjacima koji su postavljeni prema odredbama ove Odluke, zabranjen je pristup neovlaštenim osobama, uznemiravanje pčela, otvaranje košnica i nanošenje bilo kakve štete na pčelinjaku.

VII - KAZNENE ODREDBE

Član 23.

Novčanom kaznom u iznosu 100,00 KM kazniće se :

- pčelar koji postavi pčelinjak suprotno odredbama člana 4. i člana 5. stav 1. ;
- pčelar koji vrši prevoz pčela suprotno odredbama člana 14. i člana 15. ;
- pčelar koji odbije nadoknaditi štetu prema članu 17. ;
- pčelar koji ne spriječi grabež prema članu 21.

Član 24.

Novčanom kaznom u iznosu od 200,00 do 500,00 KM kazniće se :

- pravno lice koje ne postupi po odredbama člana 5. stav 2.;
- pčelar koji ne postupi po odredbama člana 11. i člana 12.;
- pčelar koji ne obezbijedi veterinarski nadzor po članu 18. ;
- pčelar koji ne prijavi sumnju na bolest po članu 18. ;
- fizičko lice koje izvrši tretiranje suprotno odredbi člana 20. ;
- fizičko lice koje postupa suprotno odredbama člana 22.

Član 25.

Novčanom kaznom u iznosu od 1.000,00 do 5.000,00 KM kazniće se :

- pčelar koji vrši selenje pčelinjaka suprotno odredbama člana 6. i člana 8. ;
- udruženje pčelara koje izda saglasnost suprotno odredbama člana 9. ;
- pravno lice koje vrši prskanje hemijskim sredstvima suprotno odredbi člana 20.;

Za iste prekršaje kazniće se i odgovorno lice u pravnom licu novčanom kaznom u iznosu od 200,00 do 500,00 KM.

Pravno lice je dužno nadoknaditi pčelaru pričinjenu štetu procijenjenu od strane sudskog vještaka.

VIII - ZAVRŠNE ODREDBE

Član 26.

Obzirom da ne postoji zakonska regulativa iz oblasti pčelarstva na nivo u F BiH i USK, Općinsko vijeće će izvršiti usaglašavanje ove Odluke u roku 180 dana po donošenju propisa iz ove oblasti.

Član 27.

Općinska Služba za razvoj i poduzetništvo će u saradnji sa Udruženjem pčelara izvršiti popis postojećih pčelinjaka u roku od 30 dana od donošenja ove Odluke.

Član 28.

Nadležnost za provođenje ove Odluke imaju: Udruženje pčelara općine Cazin, Služba za razvoj i poduzetništvo općine Cazin, Kantonalna veterinarska inspekcija, Komunalna inspekcija općine Cazin.

Član 29.

Ova Odluka stupa na snagu osmog dana od dana objavljivanja u „Službenim novinama općine Cazin“.

Broj: _____
Datum, _____

PREDSJEDAVAJUĆI VIJEĆA

Ćoralić Haris